

Khamis 26 Ogos 2004

Kementerian anggap hadiah Hari Wanita

KUALA LUMPUR: Menteri Pembangunan Wanita, Keluarga dan Masyarakat, Datuk Seri Shahrizat Abdul Jalil, berkata keputusan kerajaan untuk menambah bilangan pegawai wanita sehingga mencapai 30 peratus pada peringkat pembuat dasar adalah hadiah amat bermakna sempena sambutan Hari Wanita September ini.

Beliau berkata, walaupun keistimewaan itu hanya diberikan kepada wanita yang bekerja dalam sektor perkhidmatan awam tetapi ia pertanda baik kepada pembabitan wanita sebagai pembuat dasar di negara ini.

"Saya bersyukur kepada Allah dan mengucapkan terima kasih kepada Perdana Menteri dan Kabinet kerana sensitif dan mengambil berat

isu ini," katanya ditemui selepas Majlis Pelancaran Hari Wanita 2004 di Hotel Mandarin Oriental, di sini, semalam.

Beliau berkata demikian mengulas pengumuman Perdana Menteri, Datuk Seri Abdullah Ahmad Badawi, mengenai keputusan Kabinet meluluskan 30 peratus penyertaan wanita sebagai pembuat keputusan.

Berikut itu, Shahrizat meminta wanita melengkapi diri dan menambahkan ilmu bagi membolehkan 30 peratus penyertaan wanita dalam pembuat keputusan dapat direalisasikan secepat mungkin.

"Kerajaan sudah bersetuju memberikan kita (wanita) 30 peratus pembabitan dalam membuat keputusan dan kini terpulanglah kepada wanita untuk menggunakan.

"Dasarnya sudah ada, jika wanita tidak mengisinya maka hanya tinggal dasar semata-mata," katanya.

Beliau berkata, ketika ini penyertaan wanita sebagai kumpulan pembuat keputusan hanya membabitkan 12 peratus saja yang kebanyakannya membabitkan penyertaan wanita dalam politik.

Katanya, dalam perkhidmatan awam mungkin peratusannya lebih banyak tetapi ia perlu diteliti dengan lebih terperinci kerana ia membabitkan banyak jawatan.

Shahrizat berkata, penyertaan wanita pada peringkat pembuat keputusan dan korporat masih rendah terutama di kalangan mereka yang memegang jawatan ahli lembaga pengaruh syarikat dan syarikat berkaitan kerajaan (GLC).

Katanya, wanita menjadi ahli lembaga pengaruh GLC hanya 14 peratus atau 86 orang daripada jumlah keseluruhan 613 orang.

Beliau berkata, kajian yang dijalankan kementerian juga mendapat hany 11.7 peratus jawatan utama seperti Ketua Pegawai Eksekutif, Presiden dan Naib Presiden bagi syarikat yang disenaraikan di Bursa Malaysia tahun ini disandang wanita, manakala hanya 10.6 peratus wanita menjadi ahli lembaga pengaruh syarikat berkenaan.

Sementara itu, mengulas Jawatankuasa Kabinet mengenai kesamaan gender, Shahrizat berkata, penubuhan jawatankuasa itu adalah satu lagi pencapaian amat penting bagi kementerian memastikan isu gender terus diberi perhatian.

Katanya, jawatankuasa itu akan menjadi satu forum bagi menangani isu berkaitan gender.

Beliau berkata, kementeriannya sudah lama berusaha mengetengahkan isu itu dan terharu kerana kerajaan mengambil berat mengenainya.

"Antara isu gender yang sudah berjaya diperjuangkan kementerian ialah pindaan terhadap Fasal 2 Perkara 8 Perlombongan Persekutuan pada 1 Ogos 2001 yang diluluskan Dewan Rakyat untuk melarang diskriminasi atas alasan jantina," katanya.

Terdahulu dalam ucapannya, Shahrizat berkata sambutan Hari Wanita 2004 akan dilaksanakan di peringkat akar umbi di 219 kawasan Parlimen dalam tempoh sebulan bermula semalam.

PM yakin ekonomi lebih kukuh

Oleh Azman Zakaria dan Rohaniza Idris

KUALA LUMPUR: Datuk Seri Abdullah Ahmad Badawi berharap pertumbuhan ekonomi negara dapat ditingkatkan lagi pada suku ketiga dan keempat selepas mencatat pencapaian baik sebanyak lapan peratus bagi suku kedua tahun ini.

Perdana Menteri yang gembira dengan pencapaian itu, yakin prestasi yang lebih tinggi dapat dicatat pada suku ketiga dan keempat jika tiada pergolakan ekonomi dunia.

"Saya amat gembira dan bersyukur walaupun terdapat bermacam-macam andaian oleh pelbagai pihak mengenai kemungkinan-kemungkinan dalam kita mencapai tahap pembangunan ini," katanya mengulas pencapaian Keluaran Dalam Negara Kasar (KDNK) suku tahun kedua sebanyak 8 peratus yang diumumkan Bank Negara semalam.

Perdana Menteri berkata, pencapaian suku kedua KDNK lebih tinggi berbanding 7.6 peratus pada suku pertama, iaitu secara puratanya KDNK negara berada pada tahap 7 peratus.

"Kalau situasi seperti sekarang ini kekal, saya ingat ada harapan untuk Malaysia mencapai prestasi tinggi, tetapi saya tidak dapat menetapkan angkanya," kata-

Ditanya sama ada kerajaan dapat menurunkan belanjawan defisit antara 3.5 dan 4.0 peratus sebagaimana yang disasarkan, Abdullah yang juga Menteri Kewangan berkata:

"Kita masih dalam sasaran awal. Kita masih dalam lingkungan angka yang disasarkan dan yang paling penting, kita boleh mengawal defisit."

Beliau percaya Malaysia mampu melakukan beberapa peningkatan yang boleh diperoleh daripada sebarang perubahan.

"Kerajaan memantau secara dekat sektor perkilangan, rumah dan perkhidmatan. Malah sektor pertanian juga baik," katanya.

Beliau berkata, kerajaan juga masih mampu membiayai kebanyakan aktiviti ekonomi tanpa menggunakan pinjaman luar.

"Negara mempunyai mudah tunai yang mencukupi dan tahap simpanan juga tinggi, yang mana menjadi ciri Malaysia membiayai perbelanjaannya," katanya.



ABDULLAH dan isteri Datin Seri Endon Mahmood diiringi Menteri Pembangunan Wanita, Keluarga dan Masyarakat, Datuk Seri Shahrizat Jalil (kiri) berkenalan dengan sebahagian kira-kira 500 wanita pelbagai kaum dan profesion daripada sektor kerajaan, swasta dan pertubuhan bukan kerajaan sebelum melancarkan Hari Wanita 2004 di ibu negara, semalam. – Gambar oleh Mohd Radzi Bujang

'Kerajaan tak amal diskriminasi'

► DARI MUKA 1

berkenaan cuma kira-kira 12 peratus.

Perdana Menteri berkata, kerajaan tidak mengamalkan diskriminasi dan tidak sangat mengambil kira faktor gender dalam agihan perjawatan atau lantikan jawatan penting dalam kerajaan.

"Budaya sektor awam bukanlah anti wanita, tiada perasaan seumpama itu. Setakat yang saya lihat, diskriminasi tidak nampak. Dulu mungkin ada, dulu lelaki susah nak kerja kalau bos wanita, hari ini sudah lain... tiada masalah jika wanita jadi ketua," katanya.

Katanya, beliau sendiri tidak dapat memikirkan terdapat jawatan khas untuk lelaki saja dalam perkhidmatan awam.

Beliau berharap wanita akan membuktikan keupayaan bukan saja untuk cemerlang tetapi juga menjadi wanita yang gemilang dan terbilang.

Katanya, Ketua Wanita Umno, Datuk Seri Rafidah Aziz sendiri menyatakan seorang wanita tidak harus dilihat semata-mata sebagai wanita, sebaliknya berdasarkan keupayaannya.

Pada sidang medianya, Abdullah berkata, kerajaan bagaimanapun tidak mene-

tapkan satu tempoh waktu untuk mencapai peratusan itu kerana mahu memastikan hanya yang benar-benar berkebolehan dan berkemampuan akan dipilih untuk memegang jawatan berkenaan.

"Kalau kita terlalu nak ikut waktu sangat, mungkin kita terpaksa perluhan 30 peratus itu walaupun di kalangan yang dipilih itu mungkin tidak begitu bersedia untuk jawatan pada peringkat membuat keputusan."

"Walaupun kita tak tetapkan tarikh, tak bermakna kita tak ambil berat, tak bermakna kita tak akan berusaha (ke arah itu)," katanya.

Perdana Menteri berkata, kategori jawatan itu tidak akan ditentukan secara khusus, asalkan pegawai berkenaan terbabit dalam membuat keputusan.

Ditanya sama ada ia akan turut membabitkan jawatan dalam Syarikat Berkaitan Kerajaan (GLC), beliau berkata, pada waktu ini cuma dalam perkhidmatan awam dan mungkin kemudiannya dilihat dalam sektor lain.

Menjawab soalan sama ada bilangan menteri dan timbalan menteri wanita juga akan bertambah, beliau berkata, pertambahan itu termasuk bagi Ketua Setiausaha

kementerian mungkin akan berlaku pada masa depan bergantung pada masa berkenaan.

Bagaimanapun, katanya, ruang itu tidak boleh disempitkan yang akan menyukarkan kerajaan untuk bertindak.

Perdana Menteri juga berkata, kerajaan sedia melaksanakan konsep bekerja dari rumah untuk membolehkan wanita melaksanakan tanggungjawab mendidik anak dan bekerja dalam waktu yang sama.

Katanya, dan kerajaan akan mengambil kira faktor undang-undang bagi melaksanakan konsep itu.

Mengenai cadangan supaya wanita dilantik sebagai Timbalan Mufti, beliau berkata, perkara itu bergantung kepada keadaan dan tidak menolak kemungkinan perkara itu berlaku pada masa depan.

"Jika wanita sudah boleh jadi hakim, apakah ini satu perkara yang tak mungkin berlaku? Tak perlu disensasikan."

"Kita tak mahu wanita terhad dalam jawatan tertentu saja. Dulu kita tak fikir ada wanita jadi peguam syariah, tak ada siapa terfikir berlaku tapi hari ini ada peguam wanita yang pakar dalam undang-undang syariah," katanya.